

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U VISOKOM
Broj: 041-0-Su-25-002349
Visoko, 5.12.2025. godine

Na osnovu člana 31. stav 1. Zakona o sudovima u Federaciji Bosne i Hercegovine ("Službene novine Federacije Bosne i Hercegovine" broj 38/05, 22/06, 63/10, 72/10, 7/13, 52/14 i 85/21) i člana 8. Pravilnika o unutrašnjem sudskom poslovanju („Službeni glasnik Bosne i Hercegovine“ broj: 66/12, 54/17, 60/17, 30/18 i 83/22), u postupku implementacije Zakona o zaštiti ličnih podataka („Službeni glasnik BiH“, broj 12/25), Predsjednik Općinskog suda u Visokom d o n o s i

PRAVILA PRIVATNOSTI

Cilj Pravila privatnosti Općinskog suda u Visokom (u daljem tekstu: Sud) u skladu sa članom 14. Zakona o zaštiti ličnih podataka (u daljem tekstu: Zakon), je da svim licima, čije lične podatke obrađuje, pruži osnovne informacije o navedenoj obradi na transparentan način.

1. Pravni osnov za obradu ličnih podataka

Vaše lične podatke Sud obrađuje u skladu sa članom 8. stav (1) tačkama c) i e) Zakona i drugim relevantnim propisima.

2. Svrha obrade ličnih podataka

2.1. Vaše lične podatke Sud obrađuje u svrhu ispunjavanja pravnih obaveza, u skladu s članom 8. stav (1) tačka e) Zakona, a to su:

- izrada statističkih, strateških i drugih analitičkih dokumenata,
- odgovor na zahtjeve za slobodan pristup informacijama,
- evidencija stranaka, njihovih zakonskih zastupnika i punomoćnika, notara i drugih osoba koje se evidentiraju u informacijski sistem za automatsko upravljanje predmetima (CMS i SOKOP-Mal),
- unos podataka u druge evidencije koje Sud vodi na osnovu zakona,
- zapošljavanje u Sudu,
- izrada ostalih dokumenata u okviru realizacije naloga utvrđenih od strane Visokog sudskog i tužilačkog vijeća Bosne i Hercegovine.

2.2. Vaše lične podatke Sud obrađuje i na osnovu legitimnog interesa, u skladu s članom 8. stav (1) tačka f) Zakona, u svrhu:

- sudskog učešća sudija, stručnih suradnika, državnih službenika, namještenika i drugih zaposlenika Suda na edukacijama i predavanjima,

- sudskog učešća drugih osoba koje nisu zaposlenici Suda, u slučajevima kada Sud organizira edukacije, predavanja ili slične aktivnosti.

3. Prava nositelja podataka u vezi sa obradom ličnih podataka

- **Pravo na pristup svojim ličnim podacima** - u okviru ovog prava imate pravo zatražiti informaciju o svrsi obrade, o kategoriji ličnog podataka koji se obrađuju uključujući i uvid u svoje lične podatke, o primaocima ili kategorijama primalaca, te o predviđenom vremenskom periodu u kojem će lični podaci biti čuvani. Pristup može biti ograničen samo u slučaju kada je to zakonski propisano radi zaštite prava i sloboda drugih osoba.
- **Pravo na ispravku ličnih podataka** – u okviru ovog prava možete zahtijevati ispravljanje ili dopunjavanje ličnih podataka ako Vaši podaci nisu tačni, potpuni i ažurni. U zahtjevu je potrebno navesti šta nije tačno, potpuno ili ažurno i u kojem smislu bi navedeno trebalo ispraviti, te dostaviti potrebnu dokumentaciju u prilog svojih navoda.
- **Pravo na prigovor** – imate pravo u svakom trenutku podnijeti prigovor kontroloru podataka na obradu ličnog podatka u skladu sa članom 8. stav (1) tačka e) i f) Zakona, uključujući profiliranje utemeljeno na tim odredbama.
- **Pravo na brisanje** – imate pravo na brisanje ako lični podatak više nije potreban za svrhu za koju je prikupljen, ako je nositelj podatka povukao saglasnost na kojoj je obrada utemeljena, ako je nositelj podataka uložio prigovor na obradu u skladu sa članom 23. stav (1) Zakona i ne postoje zakonski razlozi za obradu ili je nositelj podataka uložio prigovor na obradu u skladu sa članom 23. stav (2) Zakona, ako je lični podatak nezakonito obrađen, ako ne postoje drugi pravni osnovi za obradu podatka.
- **Izuzeci za ostvarivanje prava na brisanje** - radi zaštite prava na slobodu izražavanja i informiranja, zbog zakonske obaveze, u svrhu arhiviranja u javnom interesu, naučnog ili povijesnog istraživanja, statističke svrhe ili u okviru drugih zakonski propisanih razloga, pravo na brisanje može biti ograničeno.

4. Prijenos ličnih podataka drugim kontrolorima podataka

Lične podatke Sud može prenijeti drugim kontrolorima podataka i pružaocima informatičko-komunikacijskih usluga s kojima ima sklopljene ugovore, uz poštivanje pravila zaštite podataka. Također, podatke može dostaviti trećoj strani ukoliko je to potrebno za izvršavanje zakonskih obaveza ili legitimnih interesa te strane. Međutim, Sud neće prenositi lične podatke u svrhu direktnog marketinga.

5. Sigurnost ličnih podataka

Lične podatke sud obrađuje tako da se osigurava odgovarajuća sigurnost podataka, uključujući i zaštitu od neovlaštene ili nezakonite obrade i od slučajnog gubitka, uništenja ili oštećenja primjenom odgovarajućih tehničkih ili organizacijskih mjera.

6. Vremenski period čuvanja ličnih podataka

Lični podaci se čuvaju onoliko dugo koliko je potrebno za ispunjenje svrhe obrade. Nakon toga, mogu se čuvati duže, u skladu s važećim zakonskim odredbama o arhivskoj građi. Podaci se čuvaju u arhivama onoliko vremena koliko je zakonski propisano.

7. Podaci o službeniku za zaštitu ličnih podataka

Henda Mujkić, stručni savjetnik za informisanje i odnose s javnošću u Općinskom sudu u Visokom.

Tel: +387 32 465-422 lok.412

e-mail: szzp@azlp.ba

Službenik za zaštitu ličnih podataka ne daje pravne savjete drugim kontrolorima i obrađivačima. Osnovna uloga službenika je davanje savjeta i preporuka o obradi ličnih podataka rukovodstvu i zaposlenim Suda, koji rade na poslovima obrade ličnih podataka, te nosiocima ličnih podataka čiji lični podaci se obrađuju od strane Suda.

8. Promjene pravila privatnosti

Pravila privatnosti se redovno ažuriraju u slučaju eventualnih promjena kako bi bila tačna i transparentna.

9. Kontakt informacije

Općinski sud u Visokom, Alije Izetbegovića broj 1. 71300 Visoko; tel: 032 465-422 i 032 465-423; fax: 032 465-418; e-mail: opsud-visoko@pravosudje.ba.



Predsjednik suda
Avdija Avdić